

經世大論序

豫章李材孟誠甫撰

儒者之學以經世爲宗以至命爲致
今古談易者必曰以道陰陽又曰說
天莫辨乎易以予觀於三百八十四
爻其所當剛柔進退吉凶趨避之理

何者而非人事惡覩其爲言天春穠
褒善貶惡賢賢賤不肖固二百四十
二年之間君卿之行事否臧也而說
者指爲性命之文命又惡在孔子不
云乎天何言哉四時行焉百物生焉
是天之宗也教之至也曰莫我知也

夫不怨天不尤人下學而上達知我
者其天乎是聖之宗也學之的也賜
於孔子之門牆達者也晚有悟喟然
而歎曰夫子之文章可得而聞也天
子之言性與天道不可得而聞也是
學之宗也命之致也而世之言文章

性道者離矣予不敏謬有測於知本
之旨以本末始終四字爲入道之樞
而經世之紐也於以均平齊治若整
綏銜而爲之控勒調馴以無遁情越
矩而性命之蘊奧此其歸宗也鄭栖
多暇爰摭經傳論之大者彙爲一編

命之曰經世大論而老列莊周言之
實而雅者亦附編焉以詔遊從之士
俾知尋繹依倣以不窳於趨蹈故題
之云爾

萬曆丁亥孟夏八日



經
十
大
部

庫

三



國家圖書館, NATIONAL CENTRAL LIBRARY, TAIWAN, R.O.C

經世大論卷一

豫章李材孟誠甫編

門人孫開校
男李漢燧

周易

夫大人者與天地合其德與日月合其明與
四時合其序與鬼神合其吉凶先天而天
弗違後天而奉天時天且弗違而况於人
乎况於鬼神乎

泰小往大來吉亨彖曰泰小往大來吉亨則

是天地交而萬物通也上下交而其志同也內陽而外陰內健而外順內君子而外小人君子道長小人道消也象曰天地交泰后以財成天地之道輔相天地之宜以左右民

否之匪人不利君子貞大往小來彖曰否之匪人不利君子貞大往小來則是天地不交而萬物不通也上下不交而天下无邦

也內陰而外陽內柔而外剛內小人而外君子小人道長君子道消也象曰天地不交否君子以儉德辟難不可榮以祿

謙亨君子有終彖曰謙亨天道下濟而光明地道卑而上行天道虧盈而益謙地道變盈而流謙鬼神害盈而福謙人道惡盈而好謙謙尊而光卑而不可踰君子之終也象曰地中有山謙君子以裒多益寡稱物

平施

豫利建侯行師彖曰豫剛應而志行順以動
豫豫順以動故天地如之而况建侯行師
乎天地以順動故日月不過而四時不忒
聖人以順動則刑罰清而民服豫之時義
大矣哉

天地之大德曰生聖人之大寶曰位何以守
位曰仁何以聚人曰財理財正辭禁民爲
非曰義

子曰知幾其神乎君子上交不諂下交不瀆
其知幾乎幾者動之微吉之先見者也君
子見幾而作不俟終日易曰介于石不終
日貞吉介如石焉寧用終日斷可識矣君
子知微知彰知柔知剛萬夫之望

鳴鶴在陰其子和之我有好爵吾與爾靡之
子曰君子居其室出其言善則千里之外

經世大論 卷一
應之况其邇者乎居其室出其言不善則
千里之外違之况其邇者乎言出乎身加
乎民行發乎邇見乎遠言行君子之樞機
樞機之發榮辱之主也言行君子之所以
動天地也可不慎乎

善不積不足以成名惡不積不足以滅身小
人以小善爲无益而弗爲也以小惡爲无
傷而弗去也故惡積而不可掩罪大而不可

可解易曰何校滅耳凶

子曰危者安其位者也亡者保其存者也亂
者有其治者也是故君子安而不忘危存
而不忘亡治而不忘亂是以身安而國家
可保也易曰其亡其亡繫于包桑

不出戶庭无咎子曰亂之所生也則言語以
爲階君不密則失臣臣不密則失身幾事
不密則害成是以君子慎密而不出也

子曰小人不耻不仁不畏不義不見利不勸
不威不懲小懲而大誡此小人之福也易
曰屢校滅趾无咎此之謂也

子曰君子安其身而後動易其心而後語定
其交而後求君子脩此三者故全也危以
動則民不與也懼以語則民不應也无交
而求則民不與也莫之與則傷之者至矣
易曰莫益之或擊之立心勿恒凶

尚書

禹曰惠迪吉從逆凶惟影響益曰吁戒哉儆
戒無虞罔失法度罔遊于逸罔淫于樂任
賢勿貳去邪勿疑疑謀勿成百志惟熙罔
違道以干百姓之譽罔拂百姓以從已之
欲無怠無荒四夷來王

帝曰來禹降水儆予成允成功惟汝賢克勤
于邦克儉于家不自滿假惟汝賢汝惟不

經世九論 卷一
五
矜天下莫與汝爭能汝惟不伐天下莫與
汝爭功予懋乃德嘉乃丕績天之曆數在
汝躬汝終陟元后人心惟危道心惟微惟
精惟一允執厥中無稽之言勿聽弗詢之
謀勿庸可愛非君可畏非民衆非元后何
戴后非衆罔與守邦欽哉慎乃有位敬修
其可願四海困窮天祿未終惟口出好興
我朕言不再

臯陶曰都在知人在安民禹曰吁咸若時惟
帝其難之知人則哲能官人安民則惠黎
民懷之能哲而惠何憂乎驩兜何遷乎有
苗何畏乎巧言令色孔壬

無教逸欲有邦兢兢業業一日二日萬幾無
曠庶官天工人其代之天叙有典勅我五
典五惇哉天秩有禮自我五禮有庸哉同
寅協恭和衷哉天命有德五服五章哉天

討有罪五刑五用哉政事懋哉懋哉天聰
明自我民聰明天明畏自我民明威達于
上下敬哉有土

五子咸怨述大禹之戒以作歌其一曰皇祖
有訓民可近不可下民惟邦本本固邦寧
予視天下愚夫愚婦一能勝予一人三失
然豈在明不見是圖予臨兆民慄乎若朽
索之馭六馬爲人上者柰何不敬

今予以爾有衆奉將天罰爾衆士同力王室
尚弼予欽承天子威命火炎崑岡玉石俱
焚天吏逸德烈于猛火殲厥渠魁脅從罔
治舊染汙俗咸與惟新嗚呼威克厥愛允
濟愛克厥威允罔功其爾衆士懋戒哉
嗚呼惟天無親克敬惟親民罔常懷懷于有
仁鬼神無常享享于克誠天位艱哉德惟
治否德亂與治同道罔不興與亂同事罔

經世文獻 卷一 七
不亡終始慎厥與惟明明后先王惟時懋
敬厥德克配上帝今王嗣有令緒尚監茲
哉若升高必自下若陟遐必自邇無輕民
事惟難無安厥位惟危慎終于始有言逆
于汝心必求諸道有言遜于汝志必求諸
非道嗚呼弗慮胡獲弗爲胡成一人元良
萬邦以貞君罔以辯言亂舊政臣罔以寵
利居成功邦其求孚于休

嗚呼明王慎德四夷咸賓無有遠邇畢獻方
物惟服食器用王乃昭德之致于異姓之
邦無替厥服分寶玉于伯叔之國時庸展
親人不易物惟德其物德盛不狎侮狎侮
君子罔以盡人心狎侮小人罔以盡其力
不役耳目百度惟貞玩人喪德玩物喪志
志以道寧言以道接不作無益害有益功
乃成不貴異物賤用物民乃足犬馬非其

土性不畜珍禽奇獸不育于國不寶遠物
則遠人格所寶惟賢則邇人安嗚呼夙夜
罔或不勤不矜細行終累大德爲山九仞
功虧一簣允迪茲生民保厥居惟乃世王
昔周公師保萬民民懷其德往慎乃司茲率
厥常懋昭周公之訓惟民其乂我聞曰至
治馨香感于神明黍稷非馨明德惟馨爾
尚式時周公之猷訓惟日孜孜無敢逸豫

凡人未見聖若不克見既見聖亦不克由
聖爾其戒哉爾惟風下民惟草圖厥政莫
或不艱有廢有興出入自爾師虞庶言同
則繹爾有嘉謀嘉猷則入告爾后于內爾
乃順之于外曰斯謀斯猷惟我后之德嗚
呼臣人咸若時惟良顯哉王曰君陳爾惟
弘周公丕訓無依勢作威無倚法以削寬
而有制從容以和殷民在辟予曰辟爾惟

勿辟予曰宥爾惟勿宥惟厥中有弗若于
汝政弗化于汝訓辟以止辟乃辟狙于姦
宥敗常亂俗三細不宥爾無忿疾于頑無
求備于一夫必有忍其乃有濟有容德乃
大簡厥修亦簡其或不修進厥良以率其
或不良惟民生厚因物有遷違上所命從
厥攸好爾克敬典在德時乃罔不變允升
于大猷惟予一人膺受多福其爾之休終
有辭於末世

王曰嗚呼凡我有官君子欽乃攸司慎乃出
令令出惟行弗惟反以公滅私民其允懷
學古入官議事以制政乃不迷其爾典常
作之師無以利口亂厥官蓄疑敗謀怠忽
荒政不學牆面蒞事惟煩戒爾卿士功崇
惟志業廣惟勤惟克果斷乃罔後艱位不
期驕祿不期侈恭儉惟德無載爾僞作德

心逸日休作僞心勞日拙居寵思危罔不
惟畏弗畏入畏推賢讓能庶官乃和不和
政厯舉能其官惟爾之能稱匪其人惟爾
不任王曰嗚呼三事暨大夫敬爾有官亂
爾有政以佑乃辟未康兆民萬邦惟無斁
禮記

道德仁義非禮不成教訓正俗非禮不備分
爭辯訟非禮不決君臣上下父子兄弟非

禮不定宦學事師非禮不親班朝治軍蒞
官行法非禮威嚴不行禱祠祭祀供給鬼
神非禮不誠不莊是以君子恭敬樽節退
讓以明禮

事親有隱而無犯左右就養無方服勤至死
致喪三年事君有犯而無隱左右就養有
方服勤至死方喪三年事師無犯無隱左
右就養無方服勤至死心喪三年

魯人有周豐也者哀公執摯請見之而曰不可公曰我其已夫使人問焉曰有虞氏未施信於民而民信之夏后氏未施敬於民而民敬之何施而得斯於民也對曰墟墓之間未施哀於民而民哀社稷宗廟之中未施敬於民而民敬殷人作誓而民始畔周人作會而民始疑苟無禮義忠信誠慤之心以涖之雖固結之民其不解乎

陽門之介夫死司城子罕入而哭之哀晉人之覘宋者反報於晉侯曰陽門之介夫死而子罕哭之哀而民說殆不可伐也孔子聞之曰善哉覘國乎詩云凡民有喪扶服救之雖微晉而已天下其孰能當之

大學之法禁於未發之謂豫當其可之謂時不陵節而施之謂孫相觀而善之謂摩此四者教之所由興也發然後禁則扞格而

系十人言 卷一
不勝時過然後學則勤苦而難成雜施而不孫則壞亂而不修獨學而無友則孤陋而寡聞燕朋逆其師燕辟廢其學此六者教之所由廢也君子既知教之所由興又知教之所由廢然後可以爲人師也

樂正子春下堂而傷其足數月不出猶有憂色門弟子曰夫子之足瘳矣數月不出猶有憂色何也樂正子春曰善如爾之問也

善如爾之問也吾聞諸曾子曾子聞諸夫子曰天之所生地之所養無人爲大父母全而生之子全而歸之可謂孝矣不虧其體不辱其身可謂全矣故君子頃步而弗敢忘孝也今予忘孝之道予是以有憂色也壹舉足而不敢忘父母壹出言而不敢忘父母壹舉足而不敢忘父母是故道而不徑舟而不游不敢以先父母之遺體行

殆壹出言而不敢忘父母是故惡言不出於口忿言不反於身不辱其身不羞其親可謂孝矣

夫禮禁亂之所由生猶坊止水之所自來也故以舊坊爲無所用而壞之者必有水敗以舊禮爲無所用而去之者必有亂患故昏姻之禮廢則夫婦之道苦而淫辟之罪多矣鄉飲酒之禮廢則長幼之序失而爭鬪之獄繁矣喪祭之禮廢則臣子之恩薄而倍死忘生者衆矣聘覲之禮廢則君臣之位失諸侯之行惡而倍畔侵陵之敗起矣故禮之教化也微其止邪也於未形使人日徙善遠罪而不自知也是以先王隆之也

孝經

子曰昔者明王之以孝治天下也不敢遺小

國之臣而况於公侯伯子男乎故得萬國之
之懽心以事其先王治國者不敢侮於鰥
寡而况於士民乎故得百姓之懽心以事
其先君治家者不敢侮於臣妾而况於妻
子乎故得人之懽心以事其親夫然故生
則親安之祭則鬼享之是以天下和平災
害不生禍亂不作故明王之以孝治天下
也如此詩云有覺德行四國順之

論語

子謂顏淵曰用之則行舍之則藏惟我與爾
有是夫子路曰子行三軍則誰與子曰暴
虎馮河死而無悔者吾不與也必也臨事
而懼好謀而成者也

子貢問政子曰足食足兵民信之矣子貢曰
必不得已而去於斯三者何先曰去兵子
貢曰必不得已而去於斯二者何先曰去

食自古皆有死民無信不立

齊景公問政於孔子孔子對曰君君臣臣父父子子公曰善哉信如君不君臣不臣父不父子不子雖有粟吾得而食諸

哀公問於有若曰年饑用不足如之何有若對曰盍徹乎曰二吾猶不足如之何其徹也對曰百姓足君孰與不足百姓不足君孰與足

子路曰衛君待子而爲政子將奚先子曰必也正名乎子路曰有是哉子之迂也奚其正子曰野哉由也君子於其所不知蓋闕如也名不正則言不順言不順則事不成事不成則禮樂不興禮樂不興則刑罰不中刑罰不中則民無所措手足故君子名之必可言也言之必可行也君子於其言無所苟而已矣

定公問一言而可以興邦有諸孔子對曰言不可以若是其幾也人之言曰爲君難爲臣不易如知爲君之難也不幾乎一言而興邦乎曰一言而喪邦有諸孔子對曰言不可以若是其幾也人之言曰予無樂乎爲君唯其言而莫予違也如其善而莫之違也不亦善乎如不善而莫之違也不幾乎一言而喪邦乎

家語

哀公問於孔子曰寡人生乎深宮之中長於婦人之手未嘗知哀也未嘗知憂也未嘗知勞也未嘗知懼也未嘗知危也孔子辟席而對曰吾君之問乃聖君之問也丘小人何足以知之哀公曰否吾子就席微吾子無所聞之矣孔子就席曰然君入廟門升自阼階仰見榱棟俯視几筵其噐存其

系世大論 卷一
人亡君以此思哀則哀將安不至矣君昧
爽而櫛冠平旦而聽朝一物不應亂之端
也君以此思憂則憂將安不至矣君平旦
而聽朝日昃而退諸侯之子孫必有在君
之廷者君以此思勞則勞將安不至矣君
出魯之四門以望魯之四郊亡國之墟列
必有數矣君以此思懼則懼將安不至矣
丘聞之君者舟也庶人者水也水則載舟

水則覆舟君以此思危則危將安不至矣
夫執國之柄履民之上凜乎如以朽索御
犇馬易曰履虎尾詩曰如履薄冰不亦危
乎哀公再拜曰寡人雖不敏請事斯語矣
曾子曰敢問何謂三至孔子曰至禮不讓而
天下治至賞不費而天下之士悅至樂無
聲而天下之民和明王篤行三至故天下
之君可得而知天下之士可得而臣天下

之民可得而用曾子曰敢問此義何謂也
孔子曰古者明王必盡知天下良士之名
既知其名又知其實然後因天下之爵以
尊之此之謂至禮不讓而天下治因天下
之祿以富天下之士此之謂至賞不費而
天下之士悅如此則天下名譽興焉此之
謂至樂無聲而天下之民和曾子曰大哉
明王之道非唐虞三代之盛其曷能如是
乎

定公問於顏淵曰東野子之善馭乎顏淵對
曰善則善矣雖然其馬將佚定公不悅三
日而校來謂之曰東野畢之馬佚兩驂裂
兩服入廄定公越席而起曰趨駕召顏淵
顏淵至公曰東野畢之馭善矣子何以知
其佚顏淵對曰臣以政知之昔舜巧於使
民而造父巧於使馬舜不窮其民造父不

窮其馬是以舜無佚民造父無佚馬也今東野畢之馭上車執轡銜體正矣步驟馳騁朝禮畢矣歷險致遠馬力盡矣然猶求馬不已是以知之也定公曰善可得少進乎顏淵對曰臣聞之鳥窮則喙獸窮則攫人窮則詐自古及今未有窮其下而能無危者也

經世大論一卷

終

經世大論卷二

豫章李材孟誠甫編

門人孫開校
男李漢燧

孟子

孟子見梁惠王王曰叟不遠千里而來亦將
有以利吾國乎孟子對曰王何必曰利亦
有仁義而已矣王曰何以利吾國大夫曰
何以利吾家士庶人曰何以利吾身上下
交征利而國危矣萬乘之國弑其君者必

經世大論 卷二
千乘之家千乘之國弑其君者必百乘之家萬取千焉千取百焉不爲不多矣苟爲後義而先利不奪不厭未有仁而遺其親者也未有義而後其君者也王亦曰仁義而已矣何必曰利

孟子見梁襄王出語人曰望之不似人君就之而不見所畏焉卒然問曰天下惡乎定吾對曰定于一孰能一之對曰不嗜殺人者能一之孰能與之對曰天下莫不與也王知夫苗乎七八月之間旱則苗槁矣天油然作雲沛然下雨則苗浡然興之矣其如是孰能禦之今夫天下之人牧未有不嗜殺人者也有不嗜殺人者則天下之民皆引領而望之矣誠如是也民歸之由水之就下沛然誰能禦之

齊宣王問曰交鄰國有道乎孟子對曰有惟

仁者爲能以大事小是故湯事葛文王事
昆夷惟智者爲能以小事大故大王事獯
鬻句踐事吳以大事小者樂天者也以小
事大者畏天者也樂天者保天下畏天者
保其國詩云畏天之威于時保之王曰大
哉言矣寡人有疾寡人好勇對曰王請無
好小勇夫撫劔疾視曰彼惡敢當我哉此
匹夫之勇敢一人者也王請大之詩云王

赫斯怒爰整其旅以遏徂莒以篤周祜以
對於天下此文王之勇也文王一怒而安
天下之民書曰天降下民作之君作之師
惟曰其助上帝寵之四方有罪無罪惟我
在天下曷敢有越厥志一人衡行於天下
武王耻之此武王之勇也而武王亦一怒
而安天下之民今王亦一怒而安天下之
民民惟恐王之不好勇也

齊宣王見孟子於雪宮王曰賢者亦有此樂乎孟子對曰有人不得則非其上矣不得而非其上者非也爲民上而不與民同樂者亦非也樂民之樂者民亦樂其樂憂民之憂者民亦憂其憂樂以天下憂以天下然而不王者未之有也

孟子曰天時不如地利地利不如人和三里之城七里之郭環而攻之而不勝夫環而攻之必有得天時者矣然而不勝者是天時不如地利也城非不高也池非不深也兵甲非不堅利也米粟非不多也委而去之是地利不如人和也故曰域民不以封疆之界固國不以山谿之險威天下不以兵革之利得道者多助失道者寡助寡助之至親戚畔之多助之至天下順之

萬章問曰象日以殺舜爲事立爲天子則放

之何也孟子曰封之也或曰放焉萬章曰
舜流共工于幽州放驩兜于崇山殺三苗
于三危殛鯀于羽山四罪而天下咸服誅
不仁也象至不仁封之有庠有庠之人奚
罪焉仁人固如是乎在他人則誅之在弟
則封之曰仁人之於弟也不藏怒焉不宿
怨焉親愛之而已矣親之欲其貴也愛之
欲其富也封之有庠富貴之也身爲天子

弟爲匹夫可謂親愛之乎敢問或曰放者
何謂也曰象不得有爲於其國天子使吏
治其國而納其貢稅焉故謂之放豈得暴
彼民哉雖然欲常常而見之故源源而來
不及貢以政接于有庠此之謂也

萬章曰堯以天下與舜有諸孟子曰否天子
不能以天下與人然則舜有天下也孰與
之曰天與之天與之者諄諄然命之乎曰

否天不言以行與事示之而已矣曰以行與事示之者如之何曰天子能薦人於天不能使天與之天下諸侯能薦人於天子不能使天子與之諸侯大夫能薦人於諸侯不能使諸侯與之大夫昔者堯薦舜於天而天受之暴之於民而民受之故曰天不言以行與事示之而已矣曰敢問薦之於天而天受之暴之於民而民受之如何

曰使之主祭而百神享之是天受之使之主事而事治百姓安之是民受之也天與之人與之故曰天子不能以天下與人魯欲使樂正子爲政孟子曰吾聞之喜而不寐寐公孫丑曰樂正子強乎曰否有知慮乎曰否多聞識乎曰否然則奚爲喜而不寐曰其爲人也好善好善足乎曰好善優於天下而况魯國乎夫苟好善則四海之內

經世大論 卷二
皆將輕千里而來告之以善夫苟不好善則人將曰訑訑予既已知之矣訑訑之聲音顏色距人於千里之外士止於千里之外則讒諂面諛之人至矣與讒諂面諛之人居國欲治可得乎

孟子曰舜發於畎畝之中傅說舉於版築之間膠鬲舉於魚鹽之中管夷吾舉於士孫叔敖舉於海百里奚舉於市故天將降大

任於是人也必先苦其心志勞其筋骨餓其體膚空乏其身行拂亂其所爲所以動心忍性曾益其所不能人恒過然後能改困於心衡於慮而後作徵於色發於聲而後喻入則無法家拂士出則無敵國外患者國恒亡然後知生於憂患而死於安樂也

桃應問曰舜爲天子臯陶爲士瞽瞍殺人則

如之何孟子曰執之而已矣然則舜不禁
與曰夫舜惡得而禁之夫有所受之也然
則舜如之何曰舜視棄天下猶棄敝屣也
竊負而逃遵海濱而處終身訥然樂而忘
天下

左傳

鄭莊公爲平王卿士王貳于虢鄭伯怨王王
曰無之故周鄭交質王子狐爲質於鄭鄭

公子忽爲質於周王崩周人將畀虢公政
夏四月鄭祭足帥師取溫之麥秋又取成
周之禾周鄭交惡君子曰信不由中質無
益也明恕而行要之以禮雖無有質誰能
間之苟有明信澗谿沼沚之毛蘋蘩蒹藻
之采筐筥錡釜之器潢汙行潦之水可薦
於鬼神可羞於王公而況君子結二國之
信行之以禮又焉用質風有采蘩采蘋雅

有行葦河酌昭忠信也

衛莊公娶于齊東宮得臣之妹曰莊姜美而無子衛人所爲賦碩人也又娶于陳曰厲嬀生孝伯蚤死其娣戴嬀生桓公莊姜以爲已子公子州吁嬖人之子也有寵而好兵公弗禁莊姜惡之石碻諫曰臣聞愛子教之以義方弗納於邪驕奢淫泆所自邪也四者之來寵祿過也將立州吁乃定之

矣若猶未也階之爲禍夫寵而不驕驕而能降降而不憾憾而能矜者鮮矣且夫賤妨貴少陵長遠間親新聞舊小加大淫破義所謂六逆也君義臣行父慈子孝兄愛弟敬所謂六順也去順效逆所以速禍也君人者將禍是務去而速之無乃不可乎弗聽

宋殤公之即位也公子馮出奔鄭鄭人欲納

之及衛州吁立將脩先君之怨於鄭而求
寵於諸侯以和其民使告於宋曰君若伐
鄭以除君害君爲主敝邑以賦與陳蔡從
則衛國之願也宋人許之於是陳蔡方睦
於衛故宋公陳侯蔡人衛人伐鄭圍其東
門五日而還公問於衆仲曰衛州吁其成
乎對曰臣聞以德和民不聞以亂以亂猶
治絲而棼之也夫州吁阻兵而安忍阻兵
無衆安忍無親衆叛親離難以濟矣夫兵
猶火也弗戢將自焚也夫州吁弑其君而
虐用其民於是乎不務令德而欲以亂成
必不免矣

公將如棠觀魚者臧僖伯諫曰凡物不足以
講大事其材不足以備器用則君不舉焉
君將納民於軌物者也故講事以度軌量
謂之軌取材以章物采謂之物不軌不物

謂之亂政亂政亟行所以敗也故春蒐夏
苗秋獮冬狩皆於農隙以講事也三年而
治兵入而振旅歸而飲至以數軍實昭文
章明貴賤辨等列順少長習威儀也鳥獸
之肉不登於俎皮革齒牙骨角毛羽不登
於器則公不射古之制也若夫山林川澤
之實器用之資阜隸之事官司之守非君
所及也公曰吾將略地焉遂往陳魚而觀
之僖伯稱疾不從

夏四月取郟大鼎于宋戊申納于大廟非禮
也臧哀伯諫曰君人者將昭德塞違以臨
照百官猶懼或失之故昭令德以示子孫
是以清廟茅屋大路越席大羹不致粢食
不鑿昭其儉也衮冕黻珽帶裳幅舄衡紃
紘紕昭其度也藻率鞞鞞鞶厲游纓昭其
數也火龍黼黻昭其文也五色比象昭其

物也錫鸞和鈴昭其聲也三辰旂旗昭其明也夫德儉而有度登降有數文物以紀之聲明以發之以臨照百官百官於是乎戒懼而不敢易紀律今滅德立違而寘其賂器於大廟以明示百官百官象之其又何誅焉國家之敗由官邪也官之失德寵賂章也郜鼎在廟章孰甚焉武王克商遷九鼎于維維邑義士猶或非之而況將昭違

亂之賂器於大廟其若之何公不聽周內史聞之曰臧孫遼其有後於魯乎君違不忘諫之以德

楚武王侵隨使薳章求成焉軍於瑕以待之隨人使少師董成鬬伯比言於楚子曰吾不得志於漢東也我則使然我張吾三軍而被吾甲兵以武臨之彼則懼而協以謀我故難間也漢東之國隨爲大隨張必弃

小國小國離楚之利也少師侈請羸師以張之熊率且比曰季梁在何益鬪伯比曰以爲後圖少師得其君王毀軍而納少師少師歸請追楚師隨侯將許之季梁止之曰天方授楚楚之羸其誘我也君何急焉臣聞小之能敵大也小道大淫所謂道忠於民而信於神也上思利民忠也祝史正辭信也今民餒而君逞欲祝史矯舉以祭

臣不知其可也公曰吾牲牷肥腍粢盛豐備何則不信對曰夫民神之主也是以聖王先成民而後致力於神故奉牲以告曰博碩肥腍謂民力之普存也謂其畜之碩大蕃滋也謂其不疾疫蠹也謂其備腍咸有也奉盛以告曰絜粢豐盛謂其三時不害而民和年豐也奉酒醴以告曰嘉栗旨酒謂其上下皆有嘉德而無違心也所謂

馨香無讒慝也故務其三時脩其五教親其九族以致其禋祀於是乎民和而神降之福故動則有成今民各有心而鬼神乏主君雖獨豐其何福之有君姑脩政而親兄弟之國庶免於難隨侯懼而脩政楚不敢伐

晉侯使大子申生伐東山臯落氏里克諫曰大子奉冢祀社稷之粢盛以朝夕視君膳

者也故曰冢子君行則守有守則從從曰撫軍守曰監國古之制也夫帥師專行謀誓軍旅君與國政之所圖也非大子之事也師在制命而已稟命則不威專命則不孝故君之嗣適不可以帥師君失其官帥師不威將焉用之且臣聞臯落氏將戰君其舍之公曰寡人有子未知其誰立焉不對而退見大子大子曰吾其廢乎對曰告

之以臨民教之以軍旅不共是懼何故廢乎且子懼不孝無懼弗得立脩已而不責人則免於難

晉侯賞從亡者介之推不言祿祿亦弗及推曰獻公之子九人唯君在矣惠懷無親外內弃之天未絕晉必將有主主晉祀者非君而誰天實置之而二三子以爲已力不亦誣乎竊人之財猶謂之盜況貪天之功

以爲已力乎下義其罪上賞其姦上下相蒙難與處矣其母曰盍亦求之以死誰對對曰充而效之罪又甚焉且出怨言不食其食其母曰亦使知之若何對曰言身之文也身將隱焉用文之是求顯也其母曰能如是乎與女偕隱晉侯求之不獲以縣上爲之田曰以志吾過且旌善人

晉侯始入而教其民二年欲用之子犯曰民

未知義未安其居於是乎出定襄王入務利民民懷生矣將用之子犯曰民未知信未宣其用於是乎伐原以示之信民易資者不求豐焉明徵其辭公曰可矣乎子犯曰民未知禮未生其共於是乎大蒐以示之禮作執秩以正其官民聽不惑而後用之出穀戍釋宋圍一戰而霸王之教也

楚子伐陸渾之戎遂至于雒觀兵于周疆定

王使王孫滿勞楚子楚子問鼎之大小輕重焉對曰在德不在鼎昔夏之方有德也遠方圖物貢金九牧鑄鼎象物百物而爲之備使民知神姦故民入川澤山林不逢不若螭魅罔兩莫能逢之用能協于上下以承天休桀有昏德鼎遷于商載祀六百商紂暴虐鼎遷于周德之休明雖小重也其姦回昏亂雖大輕也天祚明德有所底

止成王定鼎于郊鄜卜世三十年七百
天所命也周德雖衰天命未改鼎之輕重
未可問也

丙辰楚重至於邲遂次于衡雍潘黨曰君盍
築武軍而收晉尸以爲京觀臣聞克敵必
示子孫以無忘武功楚子曰非爾所知也
夫文止戈爲武武王克商作頌曰載戢干
戈載櫜弓矢我求懿德肆于時夏允王保

之又作武其卒章曰耆定爾功其三曰鋪
時繹思我徂惟求定其六曰綏萬邦屢豐
年夫武禁暴戢兵保大定功安民和衆豐
財者也故使子孫無忘其章今我使二國
暴骨暴矣觀兵以威諸侯兵不戢矣暴而
不戢安能保大猶有晉在焉得定功所違
民欲猶多民何安焉無德而強爭諸侯何
以和衆利人之幾而安人之亂以爲已榮

何以豐財武有七德我無一焉何以示子孫其爲先君官告成事而已武非吾功也古者明王伐不敬取其鯨鯢而封之以爲大戮於是乎有京觀以懲淫慝今罪無所而民皆盡忠以死君命又可以爲京觀乎祀于河作先君宮告成事而還

師曠侍於晉侯晉侯曰衛人出其君不亦甚乎對曰或者其君實甚良君將賞善而刑

淫養民如子蓋之如天容之如地民奉其君愛之如父母仰之如日月敬之如神明畏之如雷霆其可出乎夫君神之主而民之望也若困民之主匱神乏祀百姓絕望社稷無主將安用之弗去何爲天生民而立之君使司牧之勿使失性有君而爲之貳使師保之勿使過度是故天子有公諸侯有卿卿置側室大夫有貳宗士有朋友

庶人工商阜隸牧圉皆有親暱以相輔佐也善則賞之過則匡之患則救之失則革之自王以下各有父兄子弟以補察其政史爲書瞽爲詩工誦箴諫大夫規誨士傳言庶人謗商旅于市百工獻藝故夏書曰適人以木鐸徇于路官師相規工執藝事以諫正月孟春於是乎有之諫失常也天之愛民甚矣豈其使一人肆於民上以從其淫而弃天地之性必不然矣

范宣子爲政諸侯之幣重鄭人病之子產寓書於子西以告宣子曰子爲晉國四鄰諸侯不聞令德而聞重幣僑也惑之僑聞君子長國家者非無賄之患而無令名之難夫諸侯之賄聚於公室則諸侯貳若吾子賴之則晉國貳諸侯貳則晉國壞晉國貳則子之家壞何沒沒也將焉用賄夫令名

德之興也德國家之基也有基無壞無亦是務乎有德則樂樂則能久詩云樂旨君子邦家之基有令德也夫上帝臨女無貳爾心有令名也夫恕思以明德則令名載而行之是以遠至邇安毋寧使人謂子子實生我而謂子浚我以生乎象有齒以焚其身賄也宣子說乃輕幣

崔氏殺駿蔑于平陰晏子立於崔氏之門外

其人曰死乎曰獨吾君也乎哉吾死也曰行乎曰吾罪也乎哉吾亡也曰歸乎曰君死安歸君民者豈以臨民社稷是主臣君者豈爲其口實社稷是養故君爲社稷死則死之爲社稷亡則亡之若爲已死而爲已亡非其私暱誰敢任之且人有君而弑之吾焉得死之而焉得亡之將庸何歸門啓而入枕尸股而哭興三踊而出人謂崔

子必殺之崔子曰民之望也舍之得民
許男如楚楚子止之遂止鄭伯復田江南使
椒舉如晉求諸侯二君待之曰日君有惠
賜盟于宋曰晉楚之從交相見也以歲之
不易寡人願結驪於二三君使舉請聞君
若苟無四方之虞則願假寵以請於諸侯
晉侯欲勿許司馬侯曰不可楚王方侈天
或者欲逞其心以厚其毒而降之罰未可


知也其使能終亦未可知也晉楚唯天所
相不可與爭君其許之而脩德以待其歸
若歸於德吾猶將事之況諸侯乎若適淫
虐楚將弃之吾又誰與爭曰晉有三不殆
其何敵之有國險而多馬齊楚多難有是
三者何鄉而不濟對曰恃險與馬而虞鄰
國之難是三殆也四嶽三塗陽城大室荆
山中南九州之險也是不一姓冀之北土

馬之所生無興國焉恃險與馬不可以爲固也從古以然是以先王務脩德音以亨神人不聞其務險與馬也且鄰國之難不可虞也或多難以固其國啓其疆土或無難以喪其國失其守宇若何虞難齊有仲孫之難而獲桓公至今賴之晉有里平之難而獲文公是以爲盟主衛邢無難敵亦喪之故人之難不可虞也恃此三者而不

脩政德亡於不暇又何能濟君其許之紂作淫虐文王惠和殷是以隕周是以興夫豈爭諸侯乃許楚使使叔向對曰寡君有社稷之事是以不獲春秋時見諸侯君實有之何辱命焉

經世大論二卷終

國家圖書館, NATIONAL CENTRAL LIBRARY, TAIWAN, R.O.C.



經世大論卷三

豫章李材孟誠甫編

門人孫開校
男李漢燧

左傳

鄭人鑄刑書叔向使詒子產書曰始吾有虞
於子今則已矣昔先王議事以制不爲刑
辟懼民之有爭心也猶不可禁禦是故閑
之以義糾之以政行之以禮守之以信奉
之以仁制爲祿位以勸其從嚴斷刑罰以

威其淫懼其未也故誨之以忠聳之以行
教之以務使之以和臨之以敬涖之以彊
斷之以剛猶求聖哲之上明察之官忠信
之長慈惠之師民於是乎可任使也而不
生禍亂民知有辟則不忌於上竝有爭心
以徵於書而徼幸以成之弗可爲矣夏有
亂政而作禹刑商有亂政而作湯刑周有
亂政而作九刑三辟之興皆叔世也今吾

子相鄭國作封洹立謗政制參辟鑄刑書
將以靖民不亦難乎詩曰儀式刑文王之
德日靖四方又曰儀刑文王萬邦作孚如
是何辟之有民知爭端矣將弃禮而徵於
書錐刀之末將盡爭之亂獄滋豐賄賂並
行終子之世鄭其敗乎肸聞之國將亡必
多制其此之謂乎復書曰若吾子之言僑
不才不能及子孫吾以救世也旣不承命

敢忘大惠

楚子城陳蔡不羹使弃疾爲蔡公王問於申無宇曰弃疾在蔡何如對曰擇子莫如父擇臣莫如君鄭莊公城櫟而寘子元焉使昭公不立齊桓公城穀而寘管仲焉至于今賴之臣聞五大不在邊五細不在庭親不在外羈不在內今弃疾在外鄭丹在內君其少戒王曰國有大城何如對曰鄭京

櫟實殺曼伯宋蕭亳實殺子游齊渠丘實殺無知衛蒲戚實出獻公若由是觀之則害於國未大必折尾大不掉君所知也

齊侯疥遂疢期而不瘳諸侯之賓問疾者多在梁丘據與裔款言於公曰吾事鬼神豐於先君有加矣今君疾病爲諸侯憂是祝史之罪盍誅於祝固史嚚以辭賓公說告晏子晏子曰日宋之盟屈建問范會之德

於趙武趙武曰夫子之家事治言於晉國
竭情無私其祝史祭祀陳信不愧其家事
無猜其祝史不祈建以語康王康王曰神
人無怨宜夫子之光輔五君以爲諸侯主
也公曰據與款謂寡人能事鬼神故欲誅
於祝史子稱是語何故對曰若有德之君
外內不廢上下無怨動無違事其祝史薦
信無愧心矣是以鬼神用饗國受其福祝

史與焉其所以蕃祉老壽者爲信君使也
其言忠信於鬼神其適遇淫君外內頗邪
上下怨疾動作辟違從欲厭私高臺深池
撞鐘舞女斬刈民力輸掠其聚以成其違
不恤後人暴虐淫從肆行非度無所還忌
不思謗讟不憚鬼神怒民痛無悛於心
其祝史薦信是言罪也其蓋失數美是矯
誣也進退無辭則虛以求媚是以鬼神不

饗其國以禍之祝史與焉所以天昏孤疾者爲暴君使也其言僭嫚於鬼神公曰然則若之何對曰不可爲也山林之木衡鹿守之澤之萑蒲舟鮫守之藪之薪蒸虞候守之海之鹽蜃祈望守之縣鄙之人入從其政偪介之關暴征其私承嗣大夫強易其賄布常無藝徵歛無度宮室日更淫樂不違內寵之妾肆奪於市外寵之臣僭令

於鄙私欲養求不給則應民人苦病夫婦皆詛祝有益也詛亦有損聊攝以東姑尤以西其爲人也多矣雖其善祝豈能勝億兆人之詛君若欲誅於祝史脩德而後可公說使有司寬政毀關去禁薄歛已責

齊侯至自田晏子侍于遄臺子猶馳而造焉公曰唯據與我和夫晏子對曰據亦同也焉得爲和公曰和與同異乎對曰異和如

羹焉水火醯醢鹽梅以烹魚肉燂之以薪
宰夫和之齊之以味濟其不及以洩其過
君子食之以平其心君臣亦然君所謂可
而有否焉臣獻其否以成其可君所謂否
而有可焉臣獻其可以去其否是以政平
而不干民無爭心故詩曰亦有和羹既戒
既平鬻馘無言時靡有爭先王之濟五味
和五聲也以平其心成其政也今據不然

君所謂可據亦曰可君所謂否據亦曰否
若以水濟水誰能食之若琴瑟之專壹誰
能聽之同之不可也如是

夏公會齊侯于祝其實夾谷孔丘相犁彌言
於齊侯曰孔丘知禮而無勇若使萊人以
兵劫魯侯必得志焉齊侯從之孔丘以公
退曰士兵之兩君合好而裔夷之俘以兵
亂之非齊君所以命諸侯也裔不謀夏夷

不亂華俘不干盟兵不偏好於神爲不祥
於德爲愆義於人爲失禮君必不然齊侯
聞之遽辟之將盟齊人加於載書曰齊師
出境不以甲車三百乘從我者有如此盟
孔丘使茲無還揖對曰而不反我汶陽之
田吾以共命者亦如之齊侯將享公孔丘
謂梁丘據曰齊魯之故吾子何不聞焉事
既成矣而又享之是勤執事也且犧象不

出門嘉樂不野合饗而旣具是弃禮也若
其不具用秕稗也用秕稗君辱弃禮名惡
子盍圖之夫享所以昭德也不昭不如其
已也乃不果享齊人來歸鄆謹龜陰之田

國語

穆王將征犬戎祭公謀父諫曰不可先王耀
德不觀兵夫兵戢而時動動則威觀則玩
玩則無震是故周文公之頌曰載戢干戈

載橐弓矢我求懿德肆于時夏允王保之
先王之於民也茂正其德而厚其性阜其
財求而利其器用明利害之鄉以文修之
使務利而避害懷德而畏威故能保世以
滋大昔我先世后稷以服事虞夏及夏之
衰也棄稷弗務我先王不窋用失其官而
自竄於戎翟之間不敢怠業時序其德纂
修其緒修其訓典朝夕恪勤守以惇篤奉

以忠信奕世載德不忝前人至於武王昭
前之光明而加之以慈和事神保民莫不
欣喜商王帝辛大惡於民庶民弗忍欣戴
武王以致戎於商牧是先王非務武也勤
恤民隱而除其害也夫先王之制邦內甸
服邦外侯服侯衛賓服蠻夷要服戎翟荒
服甸服者祭侯服者祀賓服者享要服者
貢荒服者王日祭月祀時享歲貢終王先

王世大論 卷三
王之訓也有不祭則修意有不祀則修言
有不享則修文有不貢則修名有不王則
修德序成而有不至則修刑於是乎有刑
不祭伐不祀征不享讓不貢告不王於是
乎有刑罰之辟有攻伐之兵有征討之備
有威讓之令有文告之辭布令陳辭而又
不至則又增修於德無勤民於遠是以近
無不聽遠無不服今自大畢伯仕之終也

犬戎氏以其職來王天子曰予必以不享
征之且觀之兵其無乃廢先王之訓而王
幾頓乎吾聞夫犬戎樹惇能帥舊德而守
終純固其有以禦我矣王不聽遂征之得
四白狼四白鹿以歸自是荒服者不至
厲王虐國人謗王召公告王曰民不堪用矣
王怒得衛巫使監謗者以告則殺之國人
莫敢言道路以目王喜告召公曰吾能弭

謗矣乃不敢言召公曰是鄣之也防民之
口甚於防川川壅而潰傷人必多民亦如
之是故爲川決之使導爲民者宣之使言
故天子聽政使公卿至於列士獻時瞽獻
典史獻書師箴駿賦矇誦百工諫庶人傳
語近臣盡規親戚補察瞽史教誨耆艾修
之而後王斟酌焉是以事行而不悖民之
有口也猶土之有山川也財用於是乎出
猶其有原隰衍沃也衣食於是乎生口之
宣言也善敗於是乎興行善而備敗所以
阜財用衣食者也夫民慮之於心而宣之
於口成而行之胡可壅也若壅其口其與
能幾何王弗聽於是國人莫敢出言三年
乃流王於彘

十五年有神降於莘王問於內史過曰是何
故固有之乎對曰有之國之將興其君齊

明衷正精潔惠和其德足以昭其馨香其
惠足以同其民人神饗而民聽民神無怨
故明神降之觀其政德而均布福焉國之
將亡其君貪冒辟邪淫佚荒怠麤穢暴虐
其政腥臊馨香不登其刑矯誣百姓攜貳
明神弗蠲而民有遠志民神怨痛無所依
懷故神亦往焉觀其苛慝而降之禍是以
或見神以興亦或以亡昔夏之興也融降

於崇山其亡也回祿信於聆隧商之興也
禱杙次於丕山其亡也夷羊在牧周之興
也鷺鷥鳴於岐山其衰也杜伯射王於鄣
是皆明神之志者也王曰今是何神也其
誰受之對曰在虢土王曰然則何爲對曰
臣聞之道而得神是謂逢福淫而得神是
謂貪禍今虢少荒其亡乎王曰吾其若之
何對曰使大宰以祝史帥狸姓奉犧牲粢

盛王帛往獻焉無有祈也內使過從至虢
虢公亦使祝史請土焉內使過歸告王曰
虢必亡矣不禋於神而求福焉神必禍之
不親於民而求用焉民必違之精意以享
禋也慈保庶民親也今虢公動匱百姓以
逞其違離民怒神而求利焉不亦難乎十
九年晉取虢

管子

君之所審者三一日德不當其位二曰功不
當其祿三曰能不當其官此三本者治亂
之原也故國有德義未明于朝者則不可
加于尊位功力未見于國者則不可授與
重祿臨事不信于民者則不可使任大官
故德厚而位卑者謂之過德薄而位尊者
謂之失寧過于君子而毋失于小人過于
君子其爲怨淺失于小人其爲禍深是故

國有德義未明于朝而處尊位者則良臣
不進有功力未見于國而有重祿者則勞
臣不勸有臨事不信于民而任大官者則
材臣不用

老子

古之善爲士者微妙玄通深不可識夫唯不
可識故強爲之容豫兮若冬涉川猶兮若
畏四鄰儼若客渙若冰將釋敦兮其若朴

君之所審者三一曰德不當其位二曰功不
當其祿三曰能不當其官此三本者治亂
之原也故國有德義未明于朝者則不可
加于尊位功力未見于國者則不可授與
重祿臨事不信于民者則不可使任大官
故德厚而位卑者謂之過德薄而位尊者
謂之失寧過于君子而毋失于小人過于
君子其爲怨淺失于小人其爲禍深是故

經世大論 卷三
國有德義未明于朝而處尊位者則良臣
不進有功力未見于國而有重祿者則勞
臣不勸有臨事不信于民而任大官者則
材臣不用

揚子

多聞則守之以約多見則守之以卓寡聞則
無約也寡見則無卓也綠衣三百色如之
何矣紆絮三千寒如之何矣君子之道有

四易簡而易用也要而易守也炳而易見
也法而易言也震風凌雨然後知夏屋之
爲旡幪也虐政虐世然後知聖人之爲郭
郭也古者揚墨塞路孟子辭而闕之廓如
也後之塞路者有矣竊自比於孟子或曰
人各是其所是而非其所非將誰使正之
曰萬物紛錯則懸諸天衆言淆亂則折諸
聖或曰惡覩乎聖而折諸曰在則人亡則

經世大論 卷三
書其統一也

文中子

子曰化至九變王道其明乎故樂至九變而
淳氣洽矣裴晞曰何謂也子曰夫樂象成
者也象成莫大於形而流於聲王化始終
所可見也故韶之成也虞氏之恩被動植
矣烏鵲之巢可俯而窺也鳳皇何爲而藏
乎

子曰封禪之費非古也徒以夸天下其秦漢
之侈心乎

子燕居董常竇威侍子曰吾視千載已上聖
人在上者未有若周公焉其道則一而經
制大備後之爲政有所持循吾視千載而
下聖人在下者未有若仲尼焉其道則一
而述作大明後之修文者有所折中矣千
載而下有申周公之事者吾不得而見也

千載而下有紹宣尼之業者吾不得而讓也

子曰齊桓尊王室而諸侯服惟管仲知之符秦舉大號而中原靜惟王猛知之或曰符秦逆子曰晉制命者之罪也符秦何逆昔周制至公之命故齊桓管仲不得而背也晉制至私之命故符秦王猛不得而事也其應天順命安國濟民乎是以武王不敢

逆天命背人而事紂齊桓不敢逆天命背人而黜周故曰晉之罪也符秦何逆三十餘年中國士民東西南北自遠而至猛之力也

或問佛子曰聖人也曰其教何如曰西方之教也中國則泥軒車不可以適越冠冕不可以之胡古之道也

或問長生神僊之道子曰仁義不修孝悌不

立奚爲長生甚矣人之無厭也

文中子曰春穠一國之書也其以天下有國而王室不尊乎故約諸侯以尊王政以明天命之未改此春穠之事也元經天下之書也其以無定國而帝位不明乎徵天命以正帝位以明神器之有歸此元經之事也董常曰執小義妨大權春穠元經之所罪歟子曰斯謂皇之不極

文中子曰命之立也其稱人事乎故君子畏之無遠近高深而不應也無洪纖曲直而不當也故歸之於天易曰乾道變化各正性命魏徵曰書云惠迪吉從逆凶惟影響詩云不戢不難受福不那彼交匪傲萬福來求其是之謂乎子曰徵其能自取矣董常曰自取者其稱人耶子曰誠哉惟人所召賈瓊進曰敢問死生有命富貴在天何

謂也子曰召之在前命之在後斯自取也庸非命乎噫吾末如之何也已矣瓊拜而出謂程元曰吾今而後知元命可作多福可求矣程元曰敬珮玉音服之無斲

房玄齡謂薛收曰道之不行也必矣夫子何營營乎薛收曰子非夫子之徒歟天子失道則諸侯修之諸侯失道則大夫修之大夫失道則士修之士失道則庶人修之修

之之道從師無常誨而不倦窮而不濫死而後已得時則行失時則蟠此先王之道所以續而不墜也古者謂之繼時詩不云乎縱我不往子寧不嗣音如之何以不行而廢也玄齡惕然謝曰其行也如是之遠乎

樂毅

臣聞之善作者不必善成善始者不必善終

昔伍子胥說聽於闔閭而吳王遠迹至郢夫差弗是也賜之鳩夷而浮之江吳王不寤先論之可以立功故沉子胥而不悔子胥不早見主之不同量是以至於入江而不化夫免身立功以明先王之迹臣之上計也離毀辱之誹謗墮先王之名臣之所大恐也臨不測之罪以幸爲利義之所不敢出也臣聞古之君子交絕不出惡聲忠

臣去國不潔其名臣雖不佞數奉教於君子矣

賈誼

臣竊跡前事大抵彊者先反淮陰王楚最彊則最先反韓信倚胡則又反貫高因趙資則又反陳豨兵精則又反彭越用梁則又反黥布用淮南則又反盧縮最弱最後反長沙乃在二萬五千戶耳功少而最完執

踈而最忠非獨性異人也亦形執然也曩
令樊鄴絳灌據數十城而王今雖以殘亡
可也令信越之倫列爲徹侯而居雖至今
存可也然則天下之大計可知已欲諸主
之皆忠附則莫若令如長沙王欲臣子之
勿蒞醢則莫若令如樊鄴等欲天下之治
安莫若衆建諸侯而少其力力少則易使
以義國小則亡邪心令海內之執知身之
使臂臂之使指莫不制從諸侯之君不敢
有異心輻輳並進而歸命天子雖在細民
且知其安

人主之尊譬如堂群臣如陛衆庶如地故陛
九級上廉遠地則堂高陛亡級廉近地則
堂卑高者難攀卑者易陵理執然也故古
者聖王制爲等列內有公卿大夫士外有
公侯伯子男然後有官師小吏延及庶人

等級分明而天子加焉故其尊不可及也
里諺曰欲投鼠而忌器此善諭也鼠近於
器尚憚不投恐傷其器况於貴臣之近主
乎庶恥節禮以治君子故有賜死而亡戮
辱是以黥劓之臯不及大夫以其離主上
不遠也禮不敢齒君之路馬斃其芻者有
罰見君之几杖則起遭居之乘車則下入
正門則趨君之寵臣雖或有過刑戮之臯

不加其身者尊君之故也此所以爲主上
豫遠不敬也所以體貌大臣而厲其節也
遇之有禮故羣臣自憚嬰以庶恥故人矜
節行父兄之臣誠死宗廟法度之臣誠死
社稷輔翼之臣誠死君上守圉扞敵之臣
誠死城郭封疆故曰聖人有金城者比物
此志也彼且爲我死故吾得與之俱生彼
且爲我亡故吾得與之俱存夫將爲我危

經世大論 卷三
故吾得與之皆安顧行而忘利守節而仗
義故可以託不御之權可以寄六尺之孤
此厲廉恥行禮誼之所致也

董仲舒

臣謹案春穠之中視前世已行之事以觀天
人相與之際甚可畏也國家將有失道之
敗而天迺先出災害以譴告之不知自省
又出怪異以警懼之尚不知變而傷敗迺

至以此見天心之仁愛人君而欲止其亂
也自非大亡道之世者天盡欲扶持而安
全之事在彊勉而已矣彊勉學問則聞見
博而知益明彊勉行道則德日起而大有
功此皆可使還至而立有功者也詩曰夙
夜匪懈書曰茂哉茂哉皆彊勉之謂也

劉向

夫執狐疑之心者來讒賊之口持不斷之意

者開群枉之門讒邪進則衆賢退群枉盛則正士消故易有否泰小人道長君子道消則政日亂故爲否否者閉而亂也君子道長小人道消則政日治故爲泰泰者通而治也詩又云雨雪麋麋見睨聿消與易同義昔者鯀共工驩兜與舜禹雜處堯朝周公與管蔡並居周位當是時迭進相毀流言相謗豈可勝道哉帝堯成王能賢舜禹周公而消共工管蔡故以大治榮華至今孔子與季孟僭仕於魯李斯與叔孫俱宦於秦定公始皇賢季孟李斯而消孔子叔孫故以大亂汙辱至今

周子

洪範曰思曰睿睿作聖無思本也思通用也幾動於彼誠動於此無思而無不通爲聖人不思則不能通微不睿則不能無不通

是則無不通生於通微通微生於思故思者聖功之本而吉凶之機也易曰君子見幾而作不俟終日又曰知幾其神乎

聖希天賢希聖士希賢伊尹顏淵大賢也伊尹恥其君不爲堯舜一夫不得其所若撻于市顏淵不遷怒不貳過三月不違仁志伊尹之所志學顏子之所學過則聖及則賢不及則亦不失於令名

天以陽生萬物以陰成萬物生仁也成義也故聖人在上以仁育萬物以義正萬民天道行而萬物順聖德脩而萬民化大順大化不見其迹莫知其然之謂神故天下之衆本在一人道豈遠乎哉術豈多乎哉

程伯子

人之情各有所蔽故不能適道大率患在於自私而用智自私則不能以有爲爲應迹

用智則不能以明覺爲自然今以惡外物之心而求照無物之地是反鑑而索照也孟氏曰所惡於智者爲其鑿也與其非外而是內不若內外之兩忘兩忘則澄然無事矣

劉安禮問臨民曰使民各得輸其情問御吏曰正己以格物

道之不明異端害之也昔之害近而易知今之害深而難辨昔之惑人也乘其迷暗今之入人也因其高明自謂之窮神知化而不足以開物成務言爲無不周遍實則外於倫理窮深極微而不可以入堯舜之道天地之常以其心普萬物而無心聖人之常以其情順萬事而無情故君子之學莫若擴然而大公物來而順應

經世大論 卷三

四

經世大論三卷終

國家圖書館, NATIONAL CENTRAL LIBRARY, TAIWAN, R.O.C.

經世大論卷四

附編

豫章李材孟誠甫編

門人孫開校
男李漢燧

老子

古之善爲士者微妙玄通深不可識夫唯不可識故強爲之容豫兮若冬涉川猶兮若畏四鄰儼若客渙若冰將釋敦兮其若朴曠兮其若谷渾兮其若濁孰能濁以靜之徐清孰能安以久之徐生保此道者不欲

盈夫唯不盈故能敝不新成

昔之得一者天得一以清地得一以寧神得一以靈谷得一以盈萬物得一以生侯王得一以爲天下貞其致之一也天無以清將恐裂地無以寧將恐發神無以靈將恐歇谷無以盈將恐竭萬物無以生將恐滅侯王無以貴高將恐廢故貴以賤爲本高以下爲基是以侯王自謂孤寡不穀此其

以賤爲本耶非乎故致數輿無輿不欲碌碌如玉落落如石

天下有道却走馬以糞天下無道戎馬生於郊罪莫大於可欲禍莫大於不知足咎莫大於欲得故知足之足常足

其安易持其未兆易謀其脆易破其微易散爲之於未有治之於未亂合抱之木生於豪末九層之臺起於累土千里之行始於

足下爲者敗之執者失之聖人無爲故無
敗無執故無失民之從事常於幾成而敗
之慎終如始則無敗事是以聖人欲不欲
不貴難得之貨學不學復衆人之所過以
輔萬物之自然而不敢爲

列子

列子師老商氏友伯高子進二子之道乘風
而歸尹生聞之從列子居數月不省舍因

間請蘄其術者十反而十不告尹生懟而
請辭列子又不命尹生退數月意不已又
往從之列子曰汝何去來之頻尹生曰曩
章戴有請於子子不我告固有憾於子今
復脫然是以又來列子曰曩吾以汝爲達
今汝之鄙至此乎姬將告汝所學於夫子
者矣自吾之事夫子友若人也三年之後
心不敢念是非口不敢言利害始得夫子

一眄而已五年之後心庚念是非口庚言利害夫子始一解顏而笑七年之後從心之所念庚無是非從口之所言庚無利害夫子始一引吾並席而坐九年之後橫心之所念橫口之所言亦不知我之是非利害歟亦不知彼之是非利害歟亦不知夫子之爲我師若人之爲我友內外進矣而後眼如耳耳如鼻鼻如口無不同也心凝

形釋骨肉都融不覺形之所倚足之所履隨風東西猶木葉幹殼竟不知風乘我邪我乘風乎今女居先生之門曾未浹時而懟憾者再三女之片體將氣所不受汝之一節將地所不載履虛乘風其可幾乎尹生甚怍屏息良久不敢復言

子列子之齊中道而反遇伯昏瞀人伯昏瞀人曰奚方而反曰吾驚焉惡乎驚吾食於

十槩而五槩先饋伯昏瞀人曰若是則汝何爲驚已曰夫內誠不解形謀成光以外鎮人心使人輕乎貴老而整其所患夫槩人特爲食羹之貨無多餘之贏其爲利也薄其爲權也輕而猶若是而况萬乘之主身勞於國而智盡於事彼將任我以事而效我以功吾是以驚伯昏瞀人曰善哉觀乎汝處已人將保汝矣無幾何而往則戶

外之履滿矣伯昏瞀人北面而立敦杖蹙之乎頤立有間不言而出賓者以告列子列子提履徒跣而走暨乎門問曰先王旣來曾不廢藥乎曰已矣吾固告汝曰人將保汝果保汝矣非汝能使人保汝而汝不使人無汝保也而焉用之感也

造父之師曰泰豆氏造父之始從習御也執禮甚卑泰豆三年不告造父執禮愈謹乃

告之曰古詩言良弓之子必先爲箕良冶之子必先爲裘汝先觀吾趣趣如吾然後六轡可持六馬可御造父曰唯命所從泰豆乃立木爲塗僅可容足計步而置履之而行趣走往還無跌失也造父學之三日盡其巧泰豆嘆曰子何其敏也得之捷乎凡所御者亦如此也曩汝之行得之於足應之於心推於御也齊輯乎轡銜之際而

急緩乎脣吻之和正度乎胷臆之中而執節乎掌握之間內得於中心而外合於馬志是故能進退履繩而旋曲中規矩取道致遠而氣力有餘誠得其術也得之於銜應之於轡得之於轡應之於手得之於手應之於心則不以目視不以策驅心閑體正六轡不亂而二十四蹄所投無差迴旋進退莫不中節然後輿輪之外可使無餘

經世大論 卷四
轍馬蹄之外可使無餘地未嘗覺山谷之
峻原隰之夷視之一也吾術窮矣汝其識
之

楊朱曰生民之不得休息爲四事故一爲壽
二爲名三爲位四爲貨有此四者畏鬼畏
人畏威畏刑此之謂遁人也可殺可活制
命在外不逆命何羨壽不矜貴何羨名不
要勢何羨位不貪富何羨貨此之謂順民
也天下無對制命在內

揚子之鄰人亡羊旣率其黨又請揚子之豎
追之揚子曰嘻亡一羊何追者之衆鄰人
曰多岐路旣反問獲羊乎曰亡之矣曰奚
亡之曰岐路之中又有岐焉吾不知所之
所以反也揚子戚然變容不言者移時不
笑者竟日門人怪之請曰羊賤畜又非夫
子之有而損言笑者何哉揚子不答門人

不獲所命弟子孟孫陽出以告心都子心都子他日與孟孫陽偕入而問曰昔有昆第三人游齊魯之間同師而學進仁義之道而歸其父曰仁義之道若何伯曰仁義使我愛身而後名仲曰仁義使我殺身以成名叔曰仁義使我身名並全彼三術相反而同出於儒孰是孰非邪揚子曰人有濱河而居者習於水勇於泅操舟鬻渡利

供百口裹糧就學者成徒而溺死者幾半本學泅不學溺而利害如此若以爲孰是孰非心都子嘿然而出孟孫陽讓之曰何吾子問之迂夫子答之僻吾惑愈甚心都子曰大道以多岐亡羊學者以多方喪生學非本不同非本不一而未異若是唯歸同反一爲亡得喪子長先生之門習先生之道而不達先生之況也哀哉

莊子

庖丁爲文惠君解牛手之所觸肩之所倚足之所履膝之所踣砉然嚮然奏刀騞然莫不中音合於桑林之舞乃中經首之會文惠君曰譔善哉技蓋至此乎庖丁釋刀對曰臣之所好者道也進乎技矣始臣之解牛之時所見無非牛者三年之後未嘗見全牛也方今之時臣以神遇而不以目視

官知止而神欲行依乎天理批大郤導大窾因其固然技經肯綮之未嘗而況大軀乎良庖歲更刀割也族庖月更刀折也今臣之刀十九年矣所解數千牛矣而刀刃若新發於硎彼節者有間而刀刃者無厚以無厚入有間恢恢乎其於遊刃必有餘地矣是以十九年而刀刃若新發於硎雖然每至於族吾見其難爲怵然爲戒視爲

止行爲遲動刀甚微譟然已解如土委地
提刀而立爲之四顧爲之躊躇滿志善刀
而藏之文惠君曰善哉吾聞庖丁之言得
養生焉

葉公子高將使於齊問於仲尼曰王使諸梁
也甚重齊之待使者蓋將甚敬而不急匹
夫猶未可動也而況諸侯乎吾甚慄之子
嘗語諸梁也曰凡事若小若大寡不道以

懽成事若不成則必有人道之患事若成
則必有陰陽之患若成若不成而後無患
者唯有德者能之吾食也執粗而不減爨
無欲清之人今吾朝受命而夕飲冰我其
內熱與吾未至乎事之情而既有陰陽之
患矣事若不成必有人道之患是兩也爲
人臣者不足以任之子其有以語我來仲
尼曰天下有大戒二其一命也其一義也

子之愛親命也不可解於心臣之事君義也無適而非君也無所逃於天地之間是之謂大戒是以夫事其親者不擇地而安之孝之至也夫事其君者不擇事而安之忠之盛也自事其心者哀樂不易施乎前知其不可柰何而安之若命德之至也爲人臣子者固有所不得已行事之情而忘其身何暇至於悅生而惡死夫子其行可

矣丘請復以所聞凡交近則必相靡以信遠則必忠之以言言必或傳之夫傳兩善兩怒之言天下之難者也夫兩善必多溢美之言兩怒必多溢惡之言凡溢之類妄妄則其信之也莫莫則傳言者殃故法言曰傳其常情無傳其溢言則幾乎全且以巧鬪力者始乎陽常卒乎陰泰至則多竒巧以禮飲酒者始乎治常卒乎亂泰至則

多竒樂凡事亦然始乎諒常卒乎鄙其作始也簡其將畢也必巨言者風波也行者實喪也夫風波易以動實喪易以危故忿設無由巧言偏辭獸死不擇音氣息第然於是並生心厲尅核太至則必有不肖之心應之而不知其然也苟爲不知其然也孰知其所終故法言曰無遷令無勸成過度益也遷令勸成殆事美成在久惡成不及改可不慎與且夫乘物以遊心託不得已以養中至矣何作爲報也莫若爲致命此其難者

顏闔將傳衛靈公大子而問於蘧伯玉曰有人於此其德天殺與之爲無方則危吾國與之爲有方則危吾身其知適足以知人之過而不知其所以過若然者吾柰之何蘧伯玉曰善哉問乎戒之慎之正女身哉

形莫若就心莫若和雖然之二者有患就不欲入和不欲出形就而入且爲顛爲滅爲崩爲蹶心和而出且爲聲爲名爲妖爲孽彼且爲嬰兒亦與之爲嬰兒彼且爲無町畦亦與之爲無町畦彼且爲無崖亦與之爲無崖達之入於無疵汝不知夫螳螂乎怒其臂以當車轍不知其不勝任也是其才之美者也戒之慎之積伐而美者以

犯之幾矣汝不知夫養虎者乎不敢以生物與之爲其殺之之怒也不敢以全物與之爲其決之之怒也時其饑飽達其怒心虎之與人異類而媚養已者順也故其殺者逆也夫愛馬者以筐盛矢以娠盛溺適有蚤蚩僕緣而拊之不時則缺銜毀首碎胷意有所至而愛有所亡可不慎邪

桓公讀書於堂上輪扁斲輪於堂下釋椎鑿

而上問桓公曰敢問公之所讀爲何言邪
公曰聖人之言也曰聖人在乎公曰已死
矣曰然則君之所讀者古人之糟魄已夫
桓公曰寡人讀書輪人安得議乎有說則
可無說則死輪扁曰臣也以臣之事觀之
斲輪徐則甘而不固疾則苦而不入不徐
不疾得之於手而應於心口不能言有數
存焉於其間臣不能以喻臣之子臣之子

亦不能受之於臣是以行年七十而老斲
輪古之人與其不可傳也死矣然則君之
所讀者古人之糟魄已夫

古之所謂隱士者非伏其身而弗見也非閉
其言而不出也非藏其知而不發也時命
大謬也當時命而大行乎天下則反一無
迹不當時命而大窮乎天下則深根寧極
而待此存身之道也

顏淵問仲尼曰吾嘗濟乎觴深之淵津人操舟若神吾問焉曰操舟可學邪曰可善游者數能若乃夫没人則未嘗見舟而便操之也吾問焉而不吾告敢問何謂也仲尼曰善游者數能忘水也若乃夫没人之未嘗見舟而便操之也彼視淵若陵視舟之覆猶其車却也覆却萬方陳乎前而不得入其舍惡往而不暇以瓦注者巧以鉤注者憚以黃金注者殫其巧一也而有所矜則重外也凡外重者內拙

田開之見周威公威公曰吾聞祝腎學生吾子與祝腎遊亦何聞焉田開之曰開之操拔簪以待門庭亦何聞於夫子威公曰田子無讓寡人願聞之開之曰聞之夫子曰善養生者若牧羊然視其後者而鞭之威公曰何謂也田開之曰魯有單豹者岩居

而水飲不與民共利行年七十而猶有嬰兒之色不幸遇餓虎餓虎殺而食之有張毅者高門縣薄無不走也行年四十而有內熱之病以死豹養其內而虎食其外毅養其外而病攻其內此二子者皆不鞭其後者也仲尼曰無入而藏無出而陽柴立其中央三者若得其名必極夫畏塗者十殺一人則父子兄弟相戒也必盛卒徒而

後敢出焉不亦知乎人之所取畏者衽席之上飲食之間而不知爲之戒者過也

梓慶削木爲鐻鐻成見者驚猶鬼神魯侯見而問焉曰子何術以爲焉對曰臣工人何術之有雖然有一焉臣將爲鐻未嘗敢以耗氣也必齋以靜心齋三日而不敢懷慶賞爵祿齋五日不敢懷非譽巧拙齋七日輒然忘吾有四枝形體也當是時也無公

朝其巧專而外骨消然後入山林觀天性
形軀至矣然後成見鑿然後加手焉不然
則已則以天合天器之所以疑神者其是
與

林回棄千金之璧負赤子而趨或曰爲其布
與赤子之布寡矣爲其累與赤子之累多
矣棄千金之璧負赤子而趨何也林回曰
彼以利合此以天屬也夫以利合者迫窮

禍患害相棄也以天屬者迫窮禍患害相
收也夫相收之與相棄亦遠矣且君子之
交淡若水小人之交甘若醴君子淡以親
小人甘以絕彼無故以合者則無故以離
市南宜僚見魯侯魯侯有憂色市南子曰君
有憂色何也魯侯曰吾學先王之道修先
君之業吾敬鬼尊賢親而行之無須臾離
居然不免於患吾是以憂市南子曰君之

除患之術淺矣夫豐狐文豹棲於山林伏
於巖穴靜也夜行晝居戒也雖饑渴隱約
猶且胥䟽於江湖之上而求食焉定也然
且不免於罔羅機辟之患是何罪之有哉
其皮爲之灾也今魯國獨非君之皮邪吾
願君剝形去皮洒心去欲而遊於無人之
野南越有邑焉名爲建德之國其民愚而
朴少私而寡欲知作而不知藏與而不求

其報不知義之所適不知禮之所將猖狂
妄行乃蹈乎大方其生可樂其死可葬吾
願君去國捐俗與道相輔而行君曰彼其
道遠而險又有江山我無舟車柰何市南
子曰君無形倨無留居以爲君車君曰彼
其道幽遠而無人吾誰與爲鄰吾無糧我
無食安得而至焉市南子曰少君之費寡
君之欲雖無糧而乃足君其涉於江而浮

於海望之而不見其崖愈往而不知其所窮送君者皆自崖而反君自此遠矣故有人者累見有於人者憂故堯非有人非見有於人也吾願去君之累除君之憂而獨與道遊於大莫之國方舟而濟於河有虛船來觸舟雖有憚心之人不怒有一人在其上則呼張歛之一呼而不聞再呼而不聞於是三呼邪則必以惡聲隨之向也不怒而今也怒向也虛而今也實人能虛已以遊世其孰能害之

經世大論四卷終

經世大論後序

是編也我

見羅先生輯之以詔從遊士者也先生
妙契二千禩不傳之秘樂與天下萬
世公共督撫入郟吏士蒸蒸向風俄
頃助化甫閱月漢南宛洛襄滙諸博
士弟子絡繹負笈杏壇洙泗重見彬

彬濟濟哉先生群之泮宮約日而口
授之首提脩身爲本一宗剖二氏之
藩籬樹斯文之赤幟已揭本末始終
四字括盡入道之樞管定經世之紐
已又彙經傳子史中閎篇鉅章命爲
經世大論爛然錦裁炳然星麗宣尼
復起不易斯言齊治均平運之掌上

矣手示小子捧讀一過伏而嘆曰昔
關尹放言祇園說法非不競藻五千
組奇八萬卒無當於天下國家之務
者何也吾儒以其全用世而彼以其
偏出世出世者未可以用世而用世
如管商又未免膠于世故必始終本
末貫珠挈裘然後入道有真源經世

續世大論 月
有實效此先生所以獨持其大也學者由是編引而伸之觸類而長之卽六籍鱗輳諸子蝟談莫得混易牙之味其于大學思過半矣繼知府事沈鈇通判孫三省推官陳秉仁同請于先生曰馬師之相群騎也儀氏以鞞中帛以口齒謝氏以唇髻灑均躋矣

不若鎔金而範之爲馬式則人人能辨馬頭先生付編劄用廣其傳先生允所請鈇等踴躍進多士曰若聞魚兔蹄筌乎口耳佔俾履操躬踐自有徑庭者先生飭治以文戡亂以武聲望滿邊陲勲名勒鍾鼎若儕想見其經世之大都矣茲其裋身爲式作

止語默無行而不與二三子者是先生也
多士幸以言悟以身體勿拘拘方冊間
求驪黃也斯爲善學先生者哉爰僭綴于
末簡

萬曆丁亥歲孟秋朔日門人孫三省
百拜謹識

